



GOBIERNO DEL PRINCIPADO DE ASTURIAS

Martes, 28 de marzu de 2023

El Principáu edita un compendiu xurídico sobre la normativa llingüística d'Asturies

- *Derechu llingüístico del Principáu d'Asturies*, obra de Nicolás Bartolomé, recueye tola normativa y xurisprudencia relativa al asturianu y al eonaviegu nos últimos 40 años

La Consejería de Cultura, Política Llingüística y Turismu editó *Derechu llingüístico del Principáu d'Asturies. Normativa y xurisprudencia*, el primer compendiu xurídico qu'axunta tola llexislación y xurisprudencia de los últimos 40 años tocante a la llingua asturiana y l'eonaviegu.

El trabayu ye obra del abogáu y académicu correspondiente de la llingua Nicolás Bartolomé Pérez y va presentase al públicu'l xueves, 30 de marzu, a les 19:00 hores na biblioteca del Colexu d'Abogaos d'Uviéu. La publicación del volume busca poner nes manes de la sociedá asturiana, los operadores xurídicos y les administraciones públiques un manual de consulta sobre'l derechu llingüístico asturianu que recueya la normativa vixente y que pueda dir actuaklizándose nel futuru a midida que se xenere nueva llexislación. La presentación del llibru cuerre a cargu del profesor de la Universidá d'Uviéu y lletráu del Tribunal Constitucional José Manuel Pérez.

El llibru estructúrase en cuatro grandes apartaos. Hai una primer sección onde s'analiza la evolución del réxime xurídico de les llingües propies d'Asturies, un estudiu del autor que repasa los más destacaos fitos normativos, que nacen nel plurilingüísmu español que reconoz la Constitución Española de 1978 y que tienen la so primer norma p'Asturies nel artículu 4 del Estatutu d'Autonomía. Nesa introducción Nicolás Bartolomé revisa los pasos esenciales que da la xurisprudencia n'Asturies, siendo la Llei 1/98 d'Usu y Promoción del Bable/Asturianu la principal referencia.

Depués recuéyese una compilación de normes de rangu internacional (onde destaca la Carta Europea de Llingües Minoritaries), nacional, autonómico y local aplicables tanto al asturianu como al eonaviegu.

Tamién s'atopa una recopilación de tola xurisprudencia existente emanada del Tribunal Constitucional, del Tribunal Supremu y del Tribunal Superior de Xusticia d'Asturies y una partida d'anexos qu'incluyen



GOBIERNO DEL PRINCIPADO DE ASTURIAS

documentación de tipoloxía variada como resoluciones administrativas, planes de normalización llingüística, ordenances municipales, informes, convenios, etc. Finalmente, la obra complétase con una bibliografía estensa de referencia y consulta sobre la materia.

D'esta publicación faise edición en papel, non venal, y edición dixital, que se pon a disposición de toles persones interesaes.